



Senin, 04 September 2023

Ogen: Kejadin 42:1-4



Nukur Si Perluna



Lit tokoh si ngerana nina, doni enda cukup nikapken keperluan kerina manusia tapi la cukup man kalak si biakna rangap. Lit pe istilah si megati si belasken e me 'cuci mata' ku ingan-ingan perbelanjaan. I je meriah si akap natap-natap dungna si tukur me si ateta ngena. Banci saja si ateta ngena e labo jadi keperluan si mendesak arus lit. Meriah siakap nukur ninta e pe jadi kesehaten nge. Oratennta sekali enda mpersingeti kita gelah nukur siperluna. Jusup enggo jadi wakil raja tupung lit kelihen i Mesir ras sekelewetna, atan pe kuta Kanaan si i je tading bapana ras seninana. Erkiteken kelihen si mesangat, lanai lit persediaan pangan i ja pa pe seakatan i Mesir. E maka isuruh Jakub me anak-anakna ku Mesir lako nukur gandum gelah banci ia man ras anak kempuna. Sepuluh kalak anak Jakub berkat nukur gandum. Itukurna gandum ndai asa cukupna guna pangan keluarganya. Lit pe senna, la banci lebih itukurna, adi pagi enggo keru, banci ka tukur mulihi. Istilah si gundari la banci isimpan seh erbulan-bulan. Tujunna gelah kerina kenan, sabap kuta-kuta sideban pe ngenanami kelihen. Tukur seperluna, lit je makna mediate man kalak sideban. Melala pe banci si tukur erkiteken lit senta, e maka si simpan bas rumahta, tapi kalak si deban lanai lit man tukurena erkiteken man banta, enda labo payo. Biak si bage banci kataken merangap. Biak enda dosa sabap la tek nandangi cara Tuhan erdahin mpekena-kena geluhna.

Tukur seperluna, enda pe mabai kita gelah ula lit sisa, umpamana pangan. Si eteh asa perlu ku daging kulanta, asa si e saja si tukur. Labo selera si man ikuten si erbahan sisa i bas piring. Si tuhuna banci min ndai si sisa e man kalak sideban. Tetap kita ibabai ku bas mediate man lingkungan sekelewetta. Adi si benterken pangan si la keru kita situhuna la si ergaken pemere Dibata man banta.